

## Asap debu Gunung Sinabung dijangka masuki ruang udara Malaysia, IPU tidak terjejas - MetMalaysia

Fauzi Suhaimi

Ogos 10, 2020 18:03 MYT



*Jailan berkata, keadaan ini hanya boleh menjejaskan operasi penerbangan pada paras ketinggian 1,524 meter hingga 4,267 kaki dari permukaan. - Foto REUTERS*

Kejadian letusan Gunung Berapi Sinabung tidak akan menjejaskan Indeks Pencemaran Udara (IPU) di negara ini meskipun asap debunya menghala ke arah timur dan tenggara Pulau Sumatera.

Ketua Pengarah Jabatan Meteorologi Malaysia (MetMalaysia), Jailan Simon berkata, asap debu itu bagaimanapun dijangka memasuki ruang udara negara di utara Selat Melaka dan negeri-negeri di utara serta timur Semenanjung bermula malam ini.

Katanya, keadaan ini hanya boleh menjejaskan operasi penerbangan pada paras ketinggian 1,524 meter hingga 4,267 meter dari permukaan.

"Kita jangka kesan letusan itu boleh sampai ke udara di Selat Melaka dan Semenanjung Pantai Timur tetapi, hanya menjejaskan kualiti udara untuk penerbangan sahaja.



#### SIARAN MEDIA

#### JABATAN METEOROLOGI MALAYSIA KEMENTERIAN ALAM SEKITAR DAN AIR

10 OGOS 2020

#### KESAN LETUSAN GUNUNG BERAPI SINABUNG DI INDONESIA TERHADAP RUANG UDARA MALAYSIA

Gunung berapi Sinabung di Sumatera, Indonesia telah meletus pada Isnin, 10 Ogos 2020 pada pukul 11.37 pagi. Asap debu gunung berapi tersebut dijangka memasuki ruang udara negara di utara Selat Melaka dan negeri-negeri di utara serta timur Semenanjung Malaysia (Perak, Kedah, Perlis, Pulau Pinang, Kelantan, Terengganu dan Pahang) bermula malam ini. Keadaan ini boleh menjejaskan operasi penerbangan pada paras 1,500 - 5,000 meter.

Berdasarkan kepada model trajektori HYSPLIT yang dijana MET Malaysia dan ramalan dari Pusat Amaran Debu Gunung Berapi Serantau (VAAC) Darwin, Australia, orang ramai tidak perlu bimbang kerana ia dijangka tidak akan menjejaskan kualiti udara di negara kita. Tiada kesan gempa bumi dan tsunami dijangka melanda negara kita akibat letupan gunung berapi tersebut. Keadaan semasa Indeks Pencemaran Udara (IPU) di seluruh negara menunjukkan kualiti udara yang biasa (baik dan sederhana).

Orang ramai dinasihatkan untuk sentiasa peka dengan maklumat yang dikeluarkan oleh Jabatan Meteorologi Malaysia melalui laman web rasmi, aplikasi myCuaca dan media sosial.

Sumber:  
Ketua Pengarah  
Jabatan Meteorologi Malaysia (MET Malaysia)  
Kementerian Alam Sekitar dan Air  
10 Ogos 2020



[www.met.gov.my](http://www.met.gov.my)



myCuaca



metmalaysia

RakanMET [rakanmet.met.gov.my](http://rakanmet.met.gov.my)



[mygempa.met.gov.my](http://mygempa.met.gov.my)



malaysiamet



malaysianmet



1-300-22-1638

*Kenyataan media MetMalaysia*

"Sehubungan itu, kita juga telah mengeluarkan amaran kepada operasi penerbangan untuk mengelakkan daripada menggunakan laluan itu kerana dibimbangi akan menjejaskan keselesaan penerbangan," katanya kepada *Astro AWANI* pada Isnin.

Dalam pada itu, Jailan berkata, orang ramai tidak perlu bimbang kerana ia dijangka tidak akan menjejaskan kualiti udara di negara kita.

"Tiada kesan gempa bumi dan tsunami dijangka melanda negara kita akibat letupan gunung berapi tersebut.

"Keadaan semasa IPU di seluruh negara menunjukkan kualiti udara yang biasa (baik dan sederhana)," katanya.

Orang ramai dinasihatkan untuk sentiasa peka dengan maklumat yang dikeluarkan oleh MetMalaysia melalui laman web rasmi, aplikasi myCuaca dan media sosial.

Gunung berapi Sinabung di Sumatera Utara, Indonesia kembali meletus pagi ini selepas tidak pernah meletus sejak tahun 1600 dan kembali aktif pada 2010 dan letusan terakhir dilaporkan berlaku pada Februari 2018.

#Astro Awani #gempa bumi #Gunung Berapi Sinabung #indeks pencemaran udara #IPU #jerebu  
#letupan #Letupan gunung berapi #Malaysia #media sosial #operasi #Pantai Timur #penerbangan